

DEN AMBIENTE

Claudius Philips & O.R.E.O. un biaha mas marcando historia..

E PROME LOTE DI E C.D. "HISA MI SALARIO" A SOLD OUT DEN APENAS 4 DIA..

Pasco marduga lo bautisa e C.D. den Cobalt Night Club..

**** Claudius Philips & O.R.E.O. un biaha ta marca historia cu benta di nan mas recien disco compacto titula "Hisa mi Salario". E tremendisimo produccion aki den apenas cuater dia cu el ser poni riba mercado, a sa di cosecha un exito rotundo den un benta di SOLD OUT.**

Esaki por ser considera como un otro logro grandi pa Claudius & O.R.E.O. ya cu ta masha poco artista y agrupacionnan musical por realiza un hazaña asina den un tempo record.

Ta manera DEN AMBIENTE a anticipa caba den e relato cu a sali

diaranson siman pasa, cu e C.D. aki tin tur e ingredientenan pa ser un exito grandi. Ta masha hopi bon comentario DEN AMBIENTE a ricibi tambe serca esnan cu a cumpra e C.D., kendenan a keda sumamente encanta cu e variacion di e produccion den su totalidad.

E C.D. aki a ser produci pa "the man himself" Claudius Philips, kende e biaha aki a demostra realmente cu e por realiza un produccion di su propio creativad y cu e tin e talento y inteligencia pa realiza un produccion di nivel y caliber internacional.

Tambe DEN AMBIENTE a ricibi masha bon comentario

for Morgan Isenia di Radio Curacao FM kende ta presenta e Top 40 mas popular na Curacao y cu tin un amplio conocimiento di un produccion. Morgan Isenia a analisa e C.D. di Claudius Philips y anticipa cu e C.D. aki indudablemente lo bay resulta den un "BEST SELLER" na hermana isla Curacao, na unda porcierto Claudius

Philips ta goza di un popularidad masal.

E cancion cu Morgan Isenia ta anticipa cu lo bay dal durisimo na Curacao, ta esun "PORDONAMI". Por a compronde for di Morgan Isenia cu ya caba e cancion promocional "Hisa mi salario" a drenta siman pasa riba Top 40 cu tur e posibilidadnan pa durante e temporada di carnaval alcanza e puesto number 1.

Diasabra ultimo durante e programa di DEN AMBIENTE na Radio Galactica e oyentenan mes tabata testigo na momento cu e magnate empresario/promotor Mockey Job kende ta propietario di e disco bar mas popular "Tik Tak", a relata na DEN AMBIENTE con grandi e popularidad y e aña sumamente exitoso pa Claudius & O.R.E.O. tabata y cu te ainda e produccion di "Saka e Boem" ta bendiendo na gran escala serca e turistanan y tambe e Antianonan residencia na Hulanda.

Mientrastanto DEN AMBIENTE por a compronde for di nan incansable manager Edwina Werleman kende porcierto actualmente ta sufriendo di un quebrante di salud, cu pasco

marduga (esta diamars manice diaranson) lo bay tuma lugar bautismo di e C.D. "Hisa mi Salario" den Cobalt Nightclub.

Durante e anochi super special aki Claudius & O.R.E.O. lo bay estrena tur e temanan cu ta aparece riba e C.D. y tambe nan lo duna un mini concierto cu flashbacknan di tur nan temanan exitoso.

DEN AMBIENTE AWARD 1996 A SER POSPONE PA DIA 8 DI MAART 1997..

**** E** premiacion di DEN AMBIENTE AWARD 1996 cual mester a bay tuma lugar diadomingo awor dia 29 di december a ser pospone pa dia 8 di maart 1997.

Esaki ta debi cu e aña aki ta celebracion di e prome lustro y pa e ocasion tan importante aki mester di tempo pa realiza e celebracion den un forma grandioso y unico.

Tabata intencion pa realiza esaki riba e tradicional fecha di fin di aña, pero tempo no a duna ya cu e aña aki pa DEN AMBIENTE tabata esun mas ocupa y pisa. Tabatin varios motibonan cu a pone cu no por a prepara e magno premiacion aki manera debe ser,

manera e.o. e viahe pa India na unda DEN AMBIENTE a cubri e certamen di Miss World, cual tabata net e temporada cu semper DEN AMBIENTE tabata dedica su mes na e preparacionnan necesario.

Pero tin un dicho ta bisa "No hay mal que por bien no venga", ya cu dia 8 di Maart, Aruba por bay spera un di e premiacionnan hamas visto presenta.

Preparacionnan ta den full swing y por spera varios artistanan

internacional di renombre presente durante e anochi di gala aki, cual lo bay ser realiza riba un diasabra anochi den e prestigioso Tropicana showroom di Royal Cabana Casino.

Durante e anochi grandi aki manera ta custumber lo bay tin presentacionnan di varios di e artistanan galordona, mientras cu henter show lo ser cubri pa e prestigioso canal di television A.T.V.

Tambe e interes ta sumamente grandi na hermana isla Curacao ya cu DEN AMBIENTE AWARD ta ser considera como e premiacion mas importante di Antiyas y e anochi grandioso aki lo

ser transmiti envivo pa Curacao via Radio Curacao F.M., kendenan for di oranan di atardi lo realiza nan popular Top 40 presenta pa Morgan Isenia. Manera ya a ser anuncia cu e prome lustro di DEN AMBIENTE AWARD lo ser dedica na Robert Jeand'or y Tico Kuiperi di Aruba, Tony Sherman di Curacao y varios

artistanan internacional den cual ta inclui un artista Arubiano residencia den exterior. E artistanan aki lo ser anuncia otro aña na su debido tempo, mientras un di e artistanan internacional lo keda como un sorpresa agradable durante e anochi di premiacion.

Pues keda pendiente pasobra aña 1997 Aruba lo ta riba mapa mundial via DEN AMBIENTE AWARD...

DEN AMBIENTE AWARDS 1993

